

„Dosi“ Venzin-Wieland, Sedrun

31.10.1928 – 04.06.2007

Car bab,

ussa eisi gleiti in miez onn che Ti eis buca pli cun nus. Duront quei temps eisi schabegiau dil tut ella Val: da quei che vess plaschiu a Ti ed auter. La veta va propi, sco Ti has adina detg, buca agradô, mobein ensi ed engiu. Bab, Ti vesses schau plascher Tia sepultura. Ei era bialaura quei di ed ei veva ina massa glieud, bia tschupials e bialas flurs, plaids consolonts e bi cant, fetg bi cant schizun. Quel vess plaschiu a Ti, ni stuess jeu forsa dir, quel ha plaschiu a Ti. Grond tschaffen vesses Ti era giu da veser che Tia feglia ha puspei surpriu l'ustria che Ti vevas baghegiau si ensemens cun Tia consorta. Pauc tschaffen vesses Ti matei giu dalla decisiun da buca baghegiar la Porta Alpina. Jeu audel co Ti sevilas che quels „schuloris“ hagien dau si aschi spert. Ti, che schevas adina, ch'ins duessi mai dar si, mai e pli mai. Jeu audel aber era co Ti dias ch'ei vegni perquei tuttina ad ir vinavon cun nossa Val. Quella seigi biala ed ils cuolms entuorn entuorn ils pli magnifics dil mund.

Ils davos meins hai jeu discurriu cun bia glieud sur da Tei. Ina dunna ha detg a mi: „Tgei risadas che nus vein giu beinsavens cul Dosi“. Enzatgi auter: „Tgei bien humor ch'il Dosi veva e tgei hussli luvrer ch'el era“. Auters, denter quels era bia hospes, puntueschan Tia cordialitat e moda e maniera spontana e directa. In auter ha manegiau: „Il Dosi era schon in tec in stroli, aber in simpatic stroli.“ E che Ti mavies bia memia spert cun auto da Gionda si e giu, gliez dian tuts, sapperlot! Tut priu, car bab, vegnas Ti a restar a beinenqual vischin e hosp en buna memoria. Quei fa plascher e consolescha.

Sch'jeu mirel sin Tia veta, quetel jeu ch'ei seigi iu detg bein cun Tei. Ti has giu ditg ina sanadad da fier. E pi has Ti giu il cletg da viver en in temps interessant e da gronda prosperitat - ualti segir la pli gronda che la Val Tujetsch ha giu zacu en sia historia. Tia veta cumpeglia treis etappas principales. L'affonza che Ti passentas sillla Spinatscha sco sisavel da diesch affons da Tumaisch Venzin, oriunds da Selva, e da Onna Maria Gamboni, oriunda dalla Calanca. Lu ils onns d'emprendissadi a Solothurn ed ils onns da mistregn a Sedrun, duront ils quals Ti baghegias si il Badus ed il Cristal ensemens cun Tia consorta Nesa Wieland, oriunda da Cumpadials. Strusch che Ti seretilas dalla lavour vegnan in suenter l'auter tschun beadis. Naven da lu vesan ins Tei il pli savens mond a spass cun quels per la Val ed autrô.

Mias empremas regurdientschas da Tei van anavos els onns sissonta. Ti fagevas gl'ustier ed il pasterner. La damaun marvegl fagevas Ti la rauba da pasta. Suenter solver furnevas Ti quella. Suentermiezdi vegnevan ils creflis vidlunder, las pettas e las tuortas. La sera giun tschaler fagevas Ti sillla meisa alva da marmel la patissaria, las pralinas ed ils grondius liurets da Pastgas. Pli tard has Ti midau dalla pasternaria en cuschina. Dil Badus el Cristal. Tut quei che Ti has fatg, has Ti adina fatg tschien per tschien. Quella veglia e passiun da far bein quei ch'ins fa, ei quei ch'ha adina perschuadiu mei il pli fetg vida Tei. Ed aunc enzatgei: Ti has adina giu in bien cor per quels che vevan buca la massa en buorsa ed ina simpatia tut aparti per glieud jastra, seigi quei hospes ni stagiunaris ch'han per part luvrau ensemens cun Tei duront decennis. Ord Tia bucca hai jeu mai udui in plaid rassistic, mai. Sin quei sun jeu loschs, loschs dad esser Tiu fegl.

Ussa ch'jeu scrivel a Ti quella brev, neiva ei. La spunda neidia da Valtgeva ei surtratga d'ina cozza loma che laguota mintga tun e sun. Jeu seregordele cun tgei tschaffen Ti miravas da finiastra ô cu ei neveva. Ti recitavas la poesia: „Neiv e neiv, tut la pleiv ei da neiv curclada, gie perfin sin tgamin ei la setschentada...“ Ed alla fin schevas Ti cun bucca rienta: „Quei co plai da me, quei co dat in bien unviern.“

Stai bein, car bab. Forsa sevesin nus in di. Gliez fuss flot.

Tiu Gieri